

## Nuh<sup>(a.s)</sup> Aur Unkī Kashtī

**Taurait : K̄hilqat 6:5-22**

Allaah taa'alā ne dekhā ki zameen ke saare log bahut gunaahgaar ho gae haiñ aur wo har waqt bure k̄hyaalaat hī rakhte haiñ.<sup>(5)</sup> Allaah taa'alā ko ye dekh kar bahut afsos huā ki usne zameen par iñsaanoñ ko paidā kiyā.<sup>(6)</sup> Usne faislā kiyā ki wo apne banaae hue saare iñsaanoñ ko zameen se miṭā degā. "Maiñ har iñsaan, har jaanwar, har chiḍiyā, aur har us cheez ko jo zameen par reñgtī hai, k̄hatm kar duñgā. Mujhe afsos hai maine in sab cheezoñ ko banaayā hai."<sup>(7)</sup> Lekin Nuh<sup>(a.s)</sup> ne Allaah taa'alā ko khush kar diyā.<sup>(8)</sup> Ye unkī aur unke k̄haandaan kī daastāan hai. Nuh<sup>(a.s)</sup> ne apnī saarī zindagī bahut acchī tarah se guzaarī aur wo apne waqt ke sabse acche iñsaan the. Wo hameshā Allaah taa'alā kā kahnā maante the.<sup>(9)</sup> Nuh<sup>(a.s)</sup> ke teen beṭe the: Saam, Haam, aur Yaafat.<sup>(10)</sup>

Allaah taa'alā ne dekhā ki zameen ko logoñ ne barbaad kar diyā hai. Wo zulm aur k̄hun-k̄haraabe se bhar gāi hai.<sup>(11)</sup> Allaah taa'alā ne dekhā ki logoñ ke gunaahoñ kī wajah se zameen barbaad ho chukī hai.<sup>(12)</sup> Allaah taa'alā ne Nuh<sup>(a.s)</sup> se kahā, "Iñsaanoñ kī wajah se zameen par zulm aur sitam baḍh gayā hai, islie maiñ zameen par se inheñ k̄hatm kar duñgā."<sup>(13)</sup> Tum apne liye sanobar ke peḍ kī lakḍī se ek kashtī banaao, usmeñ kamre hoñ jin ko añdar aur baahar se peḍ kī raal se poto.<sup>(14)</sup> Maiñ chaahṭā huñ ki kashtī is naap kī honī chaahie: Wo ek sau pachaas meetar lambī, chaalees meetar chaudi, aur saadhe pañdrah meetar uñchī honī chaahie.<sup>(15)</sup> Kashtī me ek chat banaao jismeñ ādhe meetar kī ek khiḍkī ho. Us kashtī ke ek taraf darwaazā banaao. Usmeñ teen mañzileñ honī chaahie: Uprī mañzil, beech kī, aur nichlī mañzil.<sup>(16)</sup>

"Tum merī baat ko dhyaan se suno: Maiñ zameen par paanī kī zabardast baad̄h bhejuñgā. Maiñ āsmaan ke neeche kī har saañs lene waalī jaandaar cheez ko k̄hatm kar duñgā, zameen par rahne waalī har cheez mar jaaegī."<sup>(17)</sup> Lekin maiñ tumse ek k̄haas ahad kartā huñ ki tum, tumhaarī beewī, tumhaare laḍke, aur unkī beewiyaañ kashtī par sawaar hoñge.<sup>(18)</sup> Aur tum apne saath har jaandaar cheezoñ kā ek joḍā bhī le jaanā. Har jaanwar kā ek nar aur ek maadā le jaanā taaki wo tumhaare saath ziñdā rah sakeñ.<sup>(19)</sup> Har tarah kī chiḍiyaañ, jaanwar, aur reñgne waalī cheezoñ ke joḍe tumhaare paas āeñge taaki tum unko ziñdā bachā sako.<sup>(20)</sup> Tum har tarah kā khaanā apnī kashtī me jamā karo taaki tum log aur jaanwar ise khā sakeñ."<sup>(21)</sup>

Nuh<sup>(a.s)</sup> ne waisā hī kiyā jaisā Allaah taa'alā ne unheñ hukm diyā thā.<sup>(22)</sup>